


Mazarin
2505

Motifs des arrests des Parlements

UNIVERSITY OF N.C. AT CHAPEL HILL



00023003358

**RARE BOOK
COLLECTION**



**THE LIBRARY OF THE
UNIVERSITY OF
NORTH CAROLINA
AT
CHAPEL HILL
Mazarin
2505**


en
v. d. 15
2 5 05

MOTIFS
DES ARRESTS
DES PARLEMENTS
DE FRANCE,
CONTRE
LE CARDINAL MAZARIN.




M. DC. LII.

MOTIFS
DES ARRÊTÉS
DES PARLEMENTS
DE FRANCE.
CONTRE
LE CARDINAL MAZARIN.



M. DC. LII



AVROY



IRE,

La douleur que souffrent tous les fidelles & tres-affectionnez sujets de vostre sacrée Majesté, par les justes apprehensions qu'ils ont d'une decadence entiere de cette Monarchie, tire continuellement du fonds de leur ame des sanglots & des lamentations. Ce qui se passe aujourd'huy sur ce grand theatre de la France leur imprime la peur de ne voir toutes ces intrigues demeslées & développées que par vne lugubre & lamentable catastrophe. Nous ne pouvons en vne telle anxieté & inquietude d'esprit avoir recours à autre qu'à vostre sacrée personne, que Dieu a fait naistre pour regner sur nous & conduire cet Estat, afin de la supplier en toute humilité de rechercher les moyens & les expediens pour restaurer les ruines arrivées en ce Royaume, & donner la paix à son peuple affligé par les desordres de la guerre Ci vile & estrangere. Vos Parlements ont encores depuis peu porté leurs tres-humbles Remonstrances aux pieds de V. M. pour la supplier d'arrester le cours des confusions presentes. La vocation qu'ont ces Illustres Compagnies de parler à V. M. & de

luy représenter ce qui concerne le bien de ses affaires & le salut de son Estat, n'exclud pas les particuliers de tout accès auprès de vostre sacrée personne ; & j'espère que V. M. n'improuvera pas le zèle & l'affection qu'un particulier pour l'affermissement & manutention de son autorité Royale, & qu'elle recevra en bonne part les considérations que ie luy présente, sur les justes & raisonnables motifs des Arrests donnez partous les Parlemens de France, contre le Cardinal Mazarin.

SIRE, Dés le temps du funeste siege de Paris les Officiers du Parlement firent des Remonstrances tres-humbles à V. M. & la supplierent de vouloir esloigner de ses Conseils, & renvoyer hors des terres de son obeïssance le Cardinal Mazarin, comme le veritable Auteur de la confusion & des desordres, dans lesquels il auoit jetté les affaires de V. M. ou par ignorance ou par malice. Je pourrois icy repeter ce qui luy fut lors représenté, d'autant que les mesmes raisons subsistent encores à present : mais y en ayant de nouvelles & de plus pressantes, ie représenteray à V. M. quels sont les iustes motifs qui ont porté les Parlemens à la supplier de vouloir maintenir & faire observer sa Declaration donnée contre le retour dudit Cardinal Mazarin, dont la presence est si pernicieuse à l'estat present de ses affaires.

SIRE, Il n'y a personne dans le Royaume, mesme de ceux qui sont attachez par leurs interests particuliers à la fortune dudit Cardinal, qui ne demeure d'accord que son administration a esté jusques à present fatale à cet Estat, pour auoir esté conduit par un pilote estrange, qui ignoreit les bancs & les escueils qui se rencontrent dans la spatieuse

tieuse mer d'une grande Monarchie telle que la France: & enfin sa conduite a publié & mis au iour son incapacité, qui la fait donner à trauers, & mettre tout au hazard de se perdre. Qu'il plaise à V. M. considerer la subtile, mais malheureuse Politique dont il s'est seruy pour guide de ses entreprises. C'est elle qui a priué V. M. & tout l'Estat des grands auantages qu'elle auroit tiré de la conclusion de la paix avec la Couronne d'Espagne. Conseil funeste, pris ou par vne malice deliberée, pour donner temps à la naissance des tumultes au dedans du Royaume par la continuation des desordres de la Guerre, & commodité aux Espagnols de reestabliir cependant leurs affaires; ou conceu dans l'obscurité d'une grossiere ignorance de la constitution interieure de l'Estat & de ses forces. Son imprudence s'est manifestée dans les continuelles cōtradictions de ses actions & desseins, qui estoient de continuer la guerre avec les estrangers, pendant qu'il jettoit abondamment dans les esprits les semences des diuisions presentes, pendant qu'il épuisoit vos finances & toute la substance de vos peuples, & qu'il reduisoit les parties interieures de l'Estat dans l'impuissance de plus contribuer aux despeses & charges ordinaires du Royaume, & aux extraordinaires pour les frais de la guerre.

Cette faute est inexcusable en sa conduite, & irreparable pour ce qui touche le bien des affaires de V. M. qui a vsé d'une clemence extraordinaire enuers ledit Cardinal Mazarin, ne l'ayant pas traité selon qu'il le meritoit. Car en mesme temps qu'il esloignoit la Paix, il auoit recours aux derniers & plus violens moyens pour exiger de l'argent de vos sujets appauuris par la suite de quatorze

campagnes de guerre , & dépouillez par le brigandage public de ceux qui sous le regne du feu Roy pere de V. M. auoient vsurpé l'autorité Royale , & en abusoient pour s'agrandir. Il ne peut alleguer aucune raison pour se descharger de ce reproche , non plus qu'il ne peut en rejeter la faute sur les Ambassadeurs Plenipotentiaires de V. M. à Munster , qui ne sont coupables que d'auoir deferé à ses ordres. Et l'on sçait qu'un d'eux estant retourné à la Cour, receut de luy des remerciemens extraordinaires & de grandes promesses de recompense, en consideration de ce qu'il n'auoit pas persisté dans la deliberation de signer l'instrument de la paix entre V. M. & le Roy Catholique.

La suite de son Ministère a esté vn enchainement de mauuais conseils & fascheuses entreprises, qui ont reduit vos sujets à l'extreme misere, & remply vostre Royaume de troubles & de confusions. Au lieu de prendre quelque bon expedient pour consoler les esprits de vos sujets abbatus par les violentes exactions faites sur eux, & de compatir quelque peu à leurs miseres, il a porté les choses dans le desespoir. Il fit aller contre les ordres du Royaume V. M. dans sa minorité au Parlement, pour y verifier des Edits Buriaux, sans les auoir auparauant examinez, & sans auoir fait reflexion s'il estoit à propos de les faire voir, s'il y pouuoit auoir lieu à des Remonstrances, & si dans la necessité & pauureté publique, l'execution en estoit possible, deuant que de faire donner par vostre autorité suprême la derniere forme à vn tel ouurage, dont la matiere n'estoit pas encore meure & bien preparée.

Lors que les contentions suruenues depuis ce temps-là, sembloient s'appaier, il excita le peuple de Paris, qui de-

7
s'esperoit de son salut, voyant qu'il violoit la parole & promesse sacrée de V. M. par l'emprisonnement de deux Officiers de vostre Parlement, dont le crime n'estoit autre que le zele qu'ils auoient monsté pour la conseruation de vos pauures sujets, exposez au pillage des Partizans, & de leurs pensionnaires. Vostre autorité se trouua alors combatuë contre elle-mesme, le Parlement voulant conseruer la dignité & le pouuoir que les Roys vos predecesseurs luy ont donné; & luy se seruant du nom de la Reyne lors Regente, pour abuser de vostre autorité suprême, en ne la faisant agir que pour ruiner les fondemens de vostre Estat, & sa pernicieuse Politique ruina au mesme temps la mutuelle confiance qui est le plus fort de la société ciuile.

Le siege de Paris, qui couste tant à la France, & qui a esté suiuy de tous les desordres que nous voyons, est vn effet de son estourdissement & de sa folie, ou de sa déloyauté. Il tourna alors les forces de vostre Estat contre la capitale ville du Royaume, qui est le sanctuaire de V. M. où paroist toute sa splendeur & toute sa gloire. Il a voulu la desoler, & arracher de vostre Couronne l'vn de ses plus beaux fleurons. Tout vostre Royaume, SIRE, a veu depuis ce temps-là le Cardinal Mazarin s'embarasser luy-mesme faute de jugement, & entraîner vos affaires dans vne confusion horrible. Sa conscience vlcérée, qui luy ostoit le repos, luy a suggeré d'éloigner long-temps V. M. de sa bonne ville de Paris, dont il auoit voulu faire mourir de faim tous les habitans, de qui il ne pouuoit supporter les regards qui estoient autant de reproches des desseins qu'il auoit voulu executer contre eux. Il a en suite

remply la Cour de diuisions, dans lesquelles peu s'en fallut qu'il ne perist luy-mesme, par la distribution qu'il faisoit inconsiderément des graces de V. M. & de là on a veu naistre des menées & factions tres-dangereuses.

Après auoir troublé la Cour de la sorte, il excita encore vne autre tempeste, commettant par la supposition d'un assassinat Mr le Prince contre Mrs le Duc de Beaufort & le Coadjuteur de Paris, n'ayant point eu de honte de faire seruir la plume & le nom du Roy pour vne action si infame & si éloignée de la generosité de nostre nation. Mais ce conseil luy reüssit mal, & au lieu de les perdre les vns par les autres, comme il auoit projecté, il se trouua confondu, & presque pris dans le piege qu'il auoit tendu aux autres; & pour se sauuer il embrassa le party de ruiner Mr le Prince, & violant les paroles qu'il luy auoit données par escrit, il le fit arrester prisonnier avec Mrs le Prince de Conty & le Duc de Longueville.

Il voulut faire croire que Mr le Prince auoit eu des desseins pernicioeux, & que pour les preuenir V. M. auoit esté obligée de le faire arrester. Cependant l'on sçauoit bien, & l'issüe a manifesté la verité, que Mr le Prince n'auoit point conceu de telles pensées, & il est clair & manifeste, que cet emprisonnement n'a eu pour motifs, que le desir d'une vengeance particuliere contre la personne de Mr le Prince: ce qui a causé la guerre ciuile dans le Royaume, & cependant V. M. a perdu Porto-Longone, qui auoit cousté tant de millions, les ennemis ont trouué les frontieres abandonnées & denuées de toute deffense, & ils ont penetré bien auant dans le Royaume, dont les principales forces auoient esté conduites en Guyenne. Conside-

rez s'il vous plaist, SIRE, son administration touchant les troubles de Bourdeaux arriuez les deux années dernières, il les a negligez dans le commencement, & n'a point voulu les pacifier, encore qu'il fust tres-facile de trouuer des expediens pour les terminer: & l'on sçait quels interrests particuliers l'ont porté à souffrir si long-temps cette diuision entre le Parlement & le Gouverneur de la Prouince. Il a aussi excité la discorde dans la Prouence entre le Parlement & le Gouverneur, entretenant les deux partis par des lettres differentes qu'il leur escriuoit par vn mesme ordinaire; & pour fomenter le dessein de se ruiner les vns les autres, tantost il appuyoit le party du Gouverneur, & tantost celuy du Parlement. Il a pouruiuy sans relasche M^r le Duc d'Angoulesme pour le porter par vne infinité de depesches & ordres de V. M. à faire l'establissement du Parlement Semestre de Prouence, jusques à luy faire des reproches tres-piquans de ce qu'il auoit ménagé vn accommodement dans l'affaire de la Châbre des Requestes, où l'autorité du Roy estoit conseruée, & qui reconcilioit tous les differens partis de la Prouince. Et certes il ne faut pas trouuer estrange s'il n'auoit pas d'inclination pour ce Prince, parce qu'estant recommandable par beaucoup d'excellentes qualitez, il a cét aduantage que du consentement de toute la France, il passe pour estre jaloux au dernier point de son honneur & de sa parole; ce qui est vn grand crime auprès d'un homme qui n'a ny l'un ny l'autre.

Et l'intention de faire ce Parlement Semestre, estoit pour faire le mesme changement dans tous les autres Parlemens de France, non pas pour le bien du seruice du Roy,

& le soulagement de ses sujets dans la distribution de la Justice, mais pour les rendre entierement souûmis à verifier toutes sortes d'Edits & de lettres, soit à la charge du peuple, soit à la ruine du sacré domaine de V. M.

Et pour oster tout sujet de repliche à Mr d'Angoulesme, qui resistoit à cette nouveauté tres-prejudiciable au service de V. M. & au repos de la prouince, il l'asseuroit que tous les Officiers du Parlement tesmoignoient d'estre satisfaits de la creation de ce Semestre. Mais au mesme temps il aduertissoit ces Officiers, que leur Gouverneur pressoit avec instance l'establissement de ce Semestre, que pour le satisfaire & retenir dans le deuoir l'on auoit esté obligé de luy accorder; mais d'autant qu'ils monstroient tant de resistance, il les assureoit de la suppression, incontinent apres qu'ils auroient executé les volontez de V. M. sur ce sujet. C'est ainsi qu'il a sagement & fidellement trauaillé dans l'administration de vostre Estat, & qu'il a formé le dessein d'auoir le gouvernement de Prouence, y allumant par des artifices la guerre entre le Gouverneur & le Parlement. Et ce que ie represente à V. M. se prouuera par les lettres du Cardinal Mazarin, que les deux Partis se sont entre-communiquées apres auoir penetré dans ses desseins. De maniere qu'au lieu d'entretenir la paix & l'vnion dans vostre Royaume, il y a par ses tromperies & duplicité de paroles semé le trouble & la diuision, qui continuënt encores. L'on est persuadé, SI R E, que V. M. n'estimera jamais pour bon & fidelle Conseiller & Ministre de son Estat, celuy qui allume la guerre Ciuile dans son Royaume, qui met la discorde & la des-vnion dans la Maison Royale, & qui rompt le lien

de l'amitié & de la concorde, qui est la mutuelle confiance qui doit estre entre V. M. la Reyne vostre Mere & M^{rs} les Princes du sang.

Qu'il me soit permis S I R E, de rapporter icy à V. M. vn exemple de la plus haute antiquité, qui est, *que les Ethiopiens se vantoient d'estre les plus heureux peuples de toute la terre, d'autant qu'ils n'auoient iamais esté gouuérnez par des estrangers.* Et certainement ils auoient raison de se glorifier d'vne si bonne fortune, d'autant qu'il est impossible qu'vn estrangier ait la veritable & sincere affection pour le pais où il se fera habitué, comme si c'estoit sa propre patrie. Nos inclinations naturelles nous attachent au bien de celle-cy, & les seuls interets nous arrestent en celuy-là, pour lequel l'estrangier n'a d'affection & de charité que selon la mesure de son aduantage particulier. S'il luy rend seruice, il ne le fera pas comme bon-patriote; mais comme mercenaire, qui ne se soucie pas des accidens & euenemens, pourueu qu'il remporte ce à quoy il aspire. Et outre ce defaut, il y en a vn autre non moins essentiel, qui est que l'estrangier ne peut sçauoir & connoistre ce qui est vtile & profitable à vn pais dont il ignore les loix fondamentales, les forces, les coustumes, & les mœurs.

La Police de vostre Monarchie, S I R E, consiste en tant de diuerses loix, coustumes & maximes, qui sont la regle de son gouuernement, qu'il n'est pas possible qu'aucun les puisse apprendre que par vn long exercice & habitude. Il faut les succer avec le lait, pour les bien gouter & digerer en vn âge meur. Vn estrangier nourry en d'autres loix, en des mœurs & coustumes toutes differentes, est incapable de les entendre, & de les appliquer aux sujets

pour lesquels elles ont esté introduites. Il faut vne longue experience pour comprendre toutes les differentes parties qui composent la Monarchie Françoise: & pour entretenir la bonne intelligence & harmonie entr'elles, il faut connoistre le rapport qu'elles ont les vnes aux autres. Ce qui paroist aux yeux d'un estranger & nouveau venu estre de nulle consequence, & trop bas pour s'y appliquer afin de le connoistre, est souuent l'une des bases & fondement de tout l'edifice.

Il n'est pas possible, SIRE, que le Cardinal Mazarin qui n'a appris en France que quelques intrigues de Cour & du cabinet, ait seulement vne mediocre connoissance des choses necessaires pour la conduite d'un grand Estat comme le vostre. Il faut qu'il sçache quels sont les degrez de jurisdiction, & quelle est l'autorité des Tribunaux qui rendent la justice à vos sujets, & les ordres qui s'y observent. Il doit connoistre les Prouinces en détail, & les diuers interests des grandes familles & maisons principales qui y sont. La science des forces de l'Estat luy est necessaire, celle aussi du genie de la nation, & ce qu'elle peut faire, & ce qui luy est contraire. Les droits Royaux de V. M. dont les Roys vos predecesseurs ont esté si jaloux, seront toujours ignorez par un estranger qui ne les a jamais confiderez. Ce qui n'est point estrange, puis que c'est un degre de perfection, où n'arriuent que ceux qui les estudient, & qui les apprennent dans l'exercice des plus grandes charges.

Le Cardinal Mazarin n'en peut auoir la connoissance, son origine estouffe en luy tous les principes d'amour & d'affection qu'il faut auoir pour les conseruer. Mais outre

ce defaut de naiffance, il y en a vn autre personnel, qui est l'estenduë de son jugement & intelligence, dont la sphere d'actiuité est refferée en des limites trop eftroits, & les mouuemens font trop irreguliers pour animer & conduire vn fi grand corps. Il est si peu judicieux, qu'il veut faire croire à tout le monde, que la connoiffance des affaires estrangeres, sans mefme la fupercielle de celles du dedans de l'Eftat, est le feul caractere d'un grand Ministre. Mais quand cela feroit ainfi, l'on peut tres-raifonnablement luy difputer qu'il porte vn tel caractere, ayant commis des fautes irreparables dans l'adminiftration des affaires du dehors. Pour en dire la verité, il est certain qu'un efprit mediocre apprendra plus en vne femaine des intereffs de vofre Royaume avec les estrangers, qu'un autre tres-habile n'en pourra comprendre en plusieurs années de ceux qui concernent l'adminiftration particuliere du dedans.

Il importe encores grandement, S I R E, pour la reputation des affaires de V. M. que ceux qui y font employez ayent au moins les apparences de probité & de preud'homie, & qu'ils viuent avec honneur; autrement ils font caufe que parmy vos peuples & les estrangers l'on juge mal de vos affaires par la mauuaife opinion qu'on a des Ministres. Le Cardinal Mazarin a eu jufques icy si peu de foin de s'acquerir la reputation de personnage vertueux, qu'il fait profeflion de ne point tenir fa parole. Il promet tout d'un temps & indifferemment la mefme chose à diuerfes perfonnes. Il fait vn commerce & trafic peu honnefte de vos graces, tant en la diftribution des Benefices, que des charges de la Cour & de celles de vofre

maison, & il fait le mesme dans celle de la Reyne mere de V. M. & de M^r d'Anjou ; & la facilité qu'il a à trouuer des duppes , fait qu'il donne desia des engagemens & des assurances pour les charges de la maison de la Reyne future espouse de V. M. & enfin, S I R E , au grand mécontentement & scandale de tous les gens de bien , il prostituë toutes les dignitez de l'Estat sans discretion , & sans iuger que les choses les plus releuées s'auilissent par la multitude & par le mauuais choix.

S I R E , il est vray que toute sa Politique consiste en intrigues proportionnées à sa capacité , qui pourroient auoir quelque peu de lustre dans les Cours de delà les monts, où l'on propose plus que l'on ne resout, où l'on specule sans beaucoup d'action , & où l'on promet beaucoup sans execution. Il auroit peut-estre pû réussir en ces lieux-là , mais ses petits tours de passe-passe , & ses continuëles tromperies , ne sont pas les instrumens propres pour administrer & regir les affaires d'un si grand Estat comme le vostre. Il faut vne forte & vigoureuse Politique, fondée sur la connoissance des loix fondamentales de la Monarchie, dont l'autorité est venerable, & l'effet tres-assuré.

Qu'il plaise à V. M. S I R E , considerer l'importance de ces choses , & que les deportemens du Cardinal Mazarin sont connus à tout le monde , qui deteste sa Politique , qui rit de ses ridicules actions , & qui deplore & lamente cependant la mauuaise fortune & condition de vostre personne & de vostre Estat, d'estre sous la conduite d'un homme de cette reputation.

S I R E , M^r le Duc d'Orleans oncle de V. M. eut raison

il y a vn an de declarer qu'il ne pouuoit plus assister dans vos conseils pendant que le Cardinal Mazarin s'y trouueroit. Il l'a fait pour n'autoriser point par sa presence les mauuais conseils qu'il prenoit, & pour se descharger du reproche que V. M. luy auroit pû faire à l'aduenir, d'auoir consenty aux desordres qu'il a causez. Il jugea qu'il estoit necessaire pour le bien de l'Estat de faire mettre en liberte M. le Prince, & de le tirer d'entre les mains du Cardinal, qui en vouloit disposer à sa volonte, & tenir enfermé celui qu'il auoit offense, dont il apprehendoit les justes resentimens. Il faisoit cesser par ce moyen la guerre ciuile, & faisant eloigner le Cardinal Mazarin, les ombrages & deffiances de plusieurs se dissipoiert. Vos Cours des Parlemens ont joint leurs vœux à ceux de M. le Duc d'Orleans, la Reyne mere de V. M. alors Regente y consentit, & V. M. y ayant egard donna assurance que sa volonte estoit que le Cardinal sortist hors des terres de vostre obeyssance sans esperance de retour, & le Parlement donna en suite son Arrest conforme à la volonte de V. M. qui ayant l'âge de majorite a de nouveau reiteré ses promesses & sa volonte par vne autentique Declaration.

Cependant, SIRE, ceux qui abusent des premiers commencemens de vostre Majorite, & qui mettent sous les pieds vos interets pour satisfaire à leurs passions particulieres, se sont seruis de tels actes publics, dans lesquels ils ont engage la foy & la parole Royale de V. M. pour dresser vn piege à M^r le Duc d'Orleans, à M^{rs} les Princes de vostre Sang, à tous vos Parlemens, & à toute la France. Leur peu de sincerite & leurs mauuaises intentions se sont finalement fait paroistre par le retour du Cardinal. Action

par laquelle ils monstrent combien peu d'estime ils font de vostre parole Royale, qu'ils engagent en des choses tres-importantes, & violent avec la mesme temerité & hardiesse que si c'estoit la leur. Ils n'ont pas considéré quel deservice ils rendoient à V. M. puis qu'ils portent vn coup mortel dans l'esprit de vos sujets, y mettant la deffiance & vne viue apprehension de leur perte & ruine, ne pouuant plus faire aucun fondement sur les paroles & promesses qui viendront de la part de V. M. & de son Conseil.

SIRE, Je diray à V. M. sous son bon plaisir, Que pour remedier aux dangers qui menacent l'Estat, il faut qu'elle reestablisce l'vnion de toute la maison Royale, & qu'elle fasse reuiure dans l'esprit de ses peuples vne entiere confiance en sa parole, pour y r'allumer d'autant plus l'amour & veneration naturelle qu'ils portent à V. M.

Cét amour & cette veneration, SIRE, ne se peut esteindre, quoy que la violence de ceux qui abusent de vostre autorité trauaille puissamment à la diminuer.

M. le Duc d'Orleans, M. le Prince, & generalement tous vos sujets ne pourront avec raison prendre aucune confiance aux paroles & promesses qui leur seront faites de la part de V. M. tandis que le Cardinal Mazarin sera près d'elle. Et certainement ils pecheroient contre les regles de la prudence, s'ils se rendoient si faciles à se laisser surprendre par les tromperies & impostures d'un homme, qu'ils connoissent n'auoir point de foy, & qui se moque de la maxime des gens d'honneur, *Qu'il faut tenir sa parole.* Comment pourront-ils se persuader que V. M. obsédée par ce mal-heureux esprit, leur ennemy irreconciliable, puisse

puisse auoir de la bonne volonté pour eux? S I R E, ceux qui par leurs factions ont fait retourner le Cardinal Mazarin, & au mesme temps fait manquer la parole de V. M. donnée à Mrs le Duc d'Orleans, à M. le Prince de Condé, à vos Parlemens, & à tous vos peuples, ont plus esbranlé vostre autorité, que si elle auoit perdu des batailles & des prouinces entieres. Ils ont mis la deffiance entre V. M. & ses sujets, dangereuse peste, qui corrompt & destruit l'harmonie qui doit estre entre le Prince & ses sujets; qui rompt le nœud par lequel ceux-cy se tiennent vnis dans le seruice & l'obeyssance enuers leur Souuerain, par l'asseurance qu'ils ont en sa parole Royale, & en l'execution de ses promesses; & qui donne vne entiere confiance au Prince de leur fidelité.

Si V. M. est en deffiance de ses sujets, elle prendra des resolutions, dont l'ombre toute seule les espouuantera, & troublera leur imagination, & en suite la meffiance ayant aussi occupé leur esprit, il y a danger qu'ils ne se portent à des actions extrauagantes, dans lesquelles eux & l'Estat pourroient courre fortune de perir.

Il n'y a personne qui ne sçache que le Cardinal Mazarin, pour regner absolument en France, & s'emparer de vostre Majorité, a trauaillé tant qu'il a pû pour luy rendre suspects & odieux Mr le Duc d'Orleans, Mrs les Princes du Sang, les Parlemens, & tous ceux qui n'ont pas voulu l'adorer, qu'il a esté si insolent & temeraire de comparer aux Cromuvels & Fairfax. Il a donné à V. M. de mauuaises impressions contre la fidelité de tous vos sujets, crime le plus detestable & horrible qui se puisse commettre, puis qu'il tend à aneantir l'amour que V. M. doit auoir pour ses

peuples, & la confiance en leur fidelité ; & que d'autre costé il esbranle leurs esprits par l'apprehension continue qu'ils ont des mauuais offices qu'il leur rend près de vous.

Et ainsi V. M. preuenüe par les fausses impressions & calomnies de cét homme artificieux, voudra employer tous les moyens possibles, voire mesme iusques aux plus rigoureux, pour s'asseurer contre les apprehensions qu'on luy aura données. Ce qui allarmera tous vos sujets, & les jettera dans le dernier desespoir : & jamais telles défiances n'ont esté suiuiues que de funestes diuisions & totales ruines. Qu'il plaise plustost à V. M. S I R E, conseruer à vos peuples la qualité que Dieu vous a donnée de Pere & conducteur, que de donner toute vostre affection à vn estranger qui en est indigne. C'est elle qui leur donne la vie & qui les soustient, & le Cardinal Mazarin pour les faire perir la veut raurir toute à soy.

V. M. voit la guerre ciuile s'allumer dans ses Estats par le retour du Cardinal Mazarin, & se fortifier par sa demeure. M^{rs} les Princes touchez d'une juste peur sont obligez de se tenir loin de vostre personne, pour ne pas tomber sous la tyrannie de cét estranger, & de repousser la force par la force pour la conseruation de leurs vies, de leur honneur, & de leur posterité. Qu'il plaise à V. M. jetter de l'eau sur cét embrasement, deuant qu'il s'espande par tout le Royaume, & deuant qu'il consume ce qui y reste d'entier. L'expedient est tres-facile. Il ne faut point d'armées à V. M. pour ramener M^{rs} les Princes tenir leur rang dans vostre Cour: qu'elle esloigne d'elle l'auteur de la mesintelligence, & tous ses adherans & fauteurs qui troublent la maison Royale.

La memoire est encore toute recente des troubles que le Marechal d'Ancre causa en France sous le regne du feu Roy pere de V. M. Cét estranger s'estant acquis l'autorité & le pouuoir absolu dans les affaires, fit emprisonner feu M. le Prince , & changea toute la face de la Cour , en mettant dans le Conseil & dans les Finances des gens nouveaux , & en chassant les anciens Ministres & Conseillers du feu Roy. Il entreprit de faire perir tous les Princes & grands Seigneurs du Royaume, qui s'estoient retirez de la Cour pour eüiter sa fureur. Il alluma la guerre ciuile dans le Royaume , & l'affaire estoit desia reduite à tel point , que l'on se diuisoit en de puissantes factions, la meilleure & la plus noble partie ne pouuant supporter qu'un estranger vsurpateur de l'autorité Royale les traitast comme ses esclaves , & qu'il publiast à la honte & infamie de la nation , que les François tenoient à gloire de le suiure & l'adorer. Opinion qu'il appuyoit sur la lascheté de ses adorateurs, que l'on appelloit de noms peu honnestes. Mais enfin l'insolence & la hardiesse de ce Fauory deuint si insupportable au Roy , qu'il se resolut de le faire chastier , afin de preuenir les maux & la ruine dont son Royaume estoit menacé , y reestabli la paix , & faire jouir ses peuples du repos & de la tranquillité : & aussi pour effacer l'opprobre & infamie que souffroit la Nation d'estre soumise à vne domination estrangere. Le chastiment qu'il receut fut suiuy d'une paix vniuerselle, de l'applaudissement de toute la France , & de la reünion de tous les esprits. Les Princes alors assiegez dans Soissons , & deliurez par la punition de la personne du Marechal d'Ancre, prirent incontinent le chemin de Paris , & pour d'autant

mieux iustifier leurs intentions , & la resistance qu'ils auoient faite contre le Marechal , qui sous le nom & l'autorité du Roy , qu'il tenoit obsédé , les auoit poursuiuis pour les opprimer & les faire perir , ils se vinrent presenter au Roy leur liberateur , sans attendre aucune Declaration d'innocence , quoy qu'il y en eust vne verifiée contre eux dans vos Parlemens.

Il en arriuera de mesme lors que V.M. aura pris vne ferme resolution de chastier le Cardinal Mazarin , ou bien , vsant d'une clemence toute extraordinaire , de le bannir à jamais de vostre Royaume avec toute sa dependance. M^{rs} les Princes & generalement tous les subjets de V.M. se rendront à ses pieds pour luy faire hommage avec tous les respects qui luy sont deûs , & pour luy rendre actions de graces immortelles de leur deliurance , & de la tranquillité dont ils jouïront à l'auenir.

Considerez , s'il vous plaist , SIRE , Que le Cardinal Mazarin a esté prosript par vostre Declaration , qu'il a esté condamné par les Arrests de tous vos Parlemens , & par les vœux vniuersels de toute la France. L'equité & la justice requierent de V. M. que la foy de vos paroles & Declarations ne soit point violée ; la seureté de vostre Estat & la tranquillité de vos peuples depend principalement de ce poinct , & presentement de l'execution & entretenement de vostre Declaration contre le Cardinal ; ne pouuant jamais y auoir d'vnion & bonne intelligence entre M^{rs} les Princes , & celuy qui violant vos ordonnances fait perdre le credit à vos paroles. Ils ont trop souuent esprouué ses tromperies , & sont assez persuadez qu'estant entré avec vne armée , & se vantant avec vne impudence injurieuse

injurieuse à la reputation de V. M. de luy auoir amené des troupes auxiliaires & stipendiées à ses despens, il a dessein de passer bien plus outre ; & qu'ayant eu l'audace & l'insolence de retourner apres les Declarations & Arrests contre luy fulminez , il medite de se venger de ceux qui ont procuré son expulsion , c'est à dire contre toute la France, qui en paroles & en effet y a contribué. De maniere que tous vos subjets se trouuent dans les mesmes interests contre le Cardinal , que M^{rs} le Duc d'Orleans , M^{rs} les Princes du sang , & vos Parlemens. Il est plus equitable , S I R E , d'esloigner vn estranger d'aupres de vostre personne , & de le chasser hors du Royaume , que de donner de la terreur à tous vos subjets , & de les precipiter dans la condition de ceux qui n'ont autre ressource que le desespoir.

Le nombre aussi de ceux qui font retourner le Cardinal Mazarin , pour satisfaire à leurs interests & passions particulieres , est trop petit pour le preferer au bien de vostre Royaume. Ils abandonnent vos interests & vostre serui-
ce , pour contenter le desir insatiable d'auarice & de vengeance dont ils sont tourmentez. V. M. ne doit auoir aucune complaisance pour des personnes si mal affectionnées , & dont les intentions sont si peruerfes & esloignées de leur deuoir. Nous esperons que V. M. reconnoistra quelque jour de quel esprit sont menez les fauteurs & partizans du Cardinal Mazarin ; que leur passion est ce qui les emporte ; que c'est par vne fausse & erronnée politique qu'ils persuadent à V. M. qu'elle est engagée par la consideration de sa reputation , & pour releuer son autorité , de le faire retourner. Et cependant ils decreditent V. M. mettant la defiance par tout : ils obligent M^{rs} les Princes à se

tenir esloignez de la Cour, à repousser la force par la force, pour se conseruer contre la fureur d'un estranger, qui retourne de l'exil pour regner sur la France.

SIRE, il vous plaira de me permettre que j'apporte en cette occasion vn exemple notable & illustre de l'histoire de l'un des predecesseurs de V. M. Le Roy Charles VII. Prince recommandable par ses victoires, se trouuoit en l'an 1424. enueloppé dans vne fascheuse guerre estrangere contre les Anglois vsurpateurs du Royaume, & en vne ciuile contre les Ducs de Bourgogne & de Bretagne Princes de son sang. Il n'y auoit point alors de meilleur ny de plus seur party à prendre pour chasser les estrangers, que de reünir ces deux Princes aupres de la personne du Roy, & oster tous les obstacles qui pouuoient empescher vn effet si salutaire. Le principal estoit l'auersion que ces Princes, & generalement toutes les grandes villes du Royaume auoient contre vn nommé Louuet President de Prouence, l'Euesque de Clermont, & M^{re} Tanneguy du Chastel, qui estoient les maistres absolus des affaires de l'Estat. De maniere que pour paruenir à la paix entre le Roy & les deux Princes, l'Euesque de Clermont, & M^{re} Tanneguy du Chastel se retirerent, y ayant apparence que les Princes & le public en demeureroient satisfaits. Mais dautant que le President de Prouence, autant & plus odieux que les autres, estoit demeuré seul dans le gouuernement, presque toutes les grandes villes furent contre le Roy, jusques à ce que ce President se fust retiré en Auignon, & en suite la guerre ciuile cessa par la reünion de la maison Royale. Si alors le Roy Charles VII. eust obserué la maxime de ceux qui soustiennent que V.

M. est engagée de retenir le Cardinal Mazarin pour soutenir son autorité, & qu'il eust tenu ferme pour faire demeurer ces trois personages dans son Conseil, il auroit ruiné entierement ses affaires, perdu son Estat & son autorité, qu'il recouura depuis & conserua hautement. Mais comme la politique du Cardinal Mazarin & de ses adherans, est directement opposée à celle de ces sages & fideles Conseillers de Charles VII. leurs intentions sont aussi toutes contraires ; car ceux-cy prefererent le bien de l'Estat à leur interest particulier & à la conseruation de leur fortune ; & au contraire le Cardinal & les siens mettent le Royaume au hazard de se perdre, pour satisfaire à leur auarice & à leur ambition.

Ce que l'Histoire dit de M^{re} Tanneguy du Chastel est memorable. Le Roy ne vouloit point se défaire de luy, mais cét homme sage & vertueux voyant les grandes affaires de son Maistre, & qu'il ne pourroit en sortir sans le secours des Princes, il alla vers le Roy, & le pria de l'envoyer quelque part hors de son Royaume, pour contenter ses aduersaires & les Princes qui le haïssoient. Ainsi il se retira à Beaucaire, bien esloigné de croire ou de persuader au Roy que son autorité fut blessée par l'esloignement d'une personne qui luy estoit agreable ; mais bien qu'elle se ruineroit par sa presence, qui alienoit du Roy les esprits des Princes & des peuples, & luy ostoit le moyen de recouurer son autorité & son Royaume vsurpé par les estrangers.

Si le Cardinal Mazarin auoit vne veritable affection pour le bien de l'Estat, comme le dit M^{re} Tanneguy du Chastel, il ne seroit jamais rentré en France pour y mettre

la confusion, & y allumer vne guerre ciuile, & ses adherans n'auroient jamais procuré son retour, s'ils aymoient autant le bien du Royaume, comme l'establissement de leurs fortunes particulieres. Aussi ne peuuent-ils éuiter d'estre notés dans l'histoire comme peu fidelles & peu affectionnez au seruice de V. M. & de son Estat. Et Dieu veuille que l'obstination aueugle du Cardinal & de ceux de sa faction à demeurer près de V. M. ne soit autant prejudiciable à la France, que la resolution de s'en retirer prise par ce sage & fidelle Conseiller, fut vtile & auantageuse aux affaires du Roy son Maistre.

Vos tres-fidelles subjets soupirent lors qu'ils voyent vn estrangier proscript vsurper vostre autorité, & qu'ils scauent que vos anciens Conseillers s'esloignent de vous, pour ne point autoriser par leur presence toutes ses actions qui tendent à la subuersion de l'Estat. Les grands Seigneurs, qui sont les ornemens de vostre Cour, & toute la Noblesse de vostre Royaume gemissent de voir vn jeune Italien près de vostre sacrée personne, qui sans merite & par les artifices seuls de sa nation jouïra des faueurs de V. M. & en esloignera tous ces vertueux & genereux subjets.

S I R E, qu'il plaïse à V. M. de considerer, qu'en souffrant que le Cardinal Mazarin continuë d'auoir la conduite de vostre Estat, il semble qu'elle croïd n'auoir pas en son Royaume aucun personnage capable de luy donner des conseils & d'auoir la direction de ses affaires. Que si V. M. en estoit reduite à tel point, l'on auroit juste raison d'apprehender que ce Royaume, destitué de personnes de capacité & de suffisance, & ne pouuant plus se soutenir de luy-mesme, ne fust bien-tost exposé en proye
aux

aux estrangers. Et certainement tous les gens de bien & grands personnages de vostre Royaume souffrent vne telle mortification de se voir mesprizez & negligez, & ils sont tombez dans vn tel estonnement de voir vn estranger eleué & mis sur leurs testes, qu'ils doutent à present s'ils vivent encores sous l'empire de la tres-noble & tres-auguste maison de France. De sorte, SIRE, que voulant tousiours conseruer inuiolablement la fidelité qu'ils vous doiuent, ils ne peuuent se soumettre sous le joug d'un estranger, qui entre dans vostre Royaume comme vn conquerant, qui a commencé par la prise d'un des Conseillers de vostre Parlement, qu'il a emmené prisonnier, & traîné en triomphe.

Qu'il plaise à V. M. de considerer les inconueniens & confusions que tire apres soy le retour dudit Cardinal qui s'est rendu odieux à tout le monde. Que V. M. & la Reyne lors Regente ont accordé son esloignement de la Cour, & expulsion hors du Royaume à M^r le Duc d'Orleans & à tous vos Parlemens, qui pour éuiter la ruine de cét Estat, en ont reiteré souuent leurs instantes prieres, accompagnées de raisons inuincibles.

Vostre Majorité ne peut auoir de plus heureux commencement, que le reſtabliſſement de la paix & de la tranquillité publique au dedans de vostre Royaume, afin de la pouuoir traiter plus auantageusement avec les estrangers, & de releuer la reputation de vostre Couronne & de vos affaires.

Preuenez, SIRE, les ruines & subuersions dont l'Estat est menacé par la continuation de la guerre ciuile, d'autant plus dangereuse qu'elle se trouue impliquée avec

vne estrangere. Que vostre bonté & clemence s'estendent sur vos subjets. Deliurez-les de la frayeur qu'ils ont de cet estrangier r'entré dans le Royaume portant le fer & le feu, & qui ne respire que la perte & destruction de tous vos meilleurs subjets.

SIRE, V. M. ne peut faire vne action plus genereuse & digne d'une parfaite Majorité, que de choisir entre ses subjets les plus sages & experimentez, & d'en composer vn Conseil, dont la prudence & fidelité vous seruent d'adresse pour prendre & tenir heureusement en main le gouuernail de la Monarchie, & vous reuestir de vostre autorité, qui estant en vostre main versera sur vos subjets des effets autant doux & fauorables, qu'ils seront facheux & pernicioeux lors qu'une main estrangere vous l'aura arrachée & en abusera à vostre prejudice.

Ne souffrez pas que l'on accoustume V. M. dès son premier âge à se contenter du nom de Roy, & à laisser toutes les actions & fonctions de la Royauté à vn seul Ministre, moins encores à vn estrangier. V. M. éuitera pour elle & sa posterité le mal-heur de ceux qui ont esté Roys sans action & sans effet, & V. M. regnera longuement & heureusement, selon le souhait de tous ses tres-humbles, tres-obeissans, & tres-fidelles subjets.

F I N.



